

台

學

統

台學統卷五十五

黃巖王 棻輯

吳興劉承幹校

詞章之學二

刪定陳子高先生克

南宋書文苑傳陳克字子高天台人呂社帥建康辟爲參謀葉夢得以書唁之曰呂安老無濟變之才子高文士非才士也是行也危哉克有赤城詞一卷

台州府志陳克字子高奉議貽序之子博學能詩薦爲刪定官呂尙書社帥建康辟致爲屬後社參督府謀議復從爲淮西之行建炎閒酈瓊之變克奮勇出戰兵敗

就擒賊叱令屈膝克曰吾爲宋臣學忠信之道寧爲珠
碎不爲瓦全賊怒積薪焚之克罵不絕口聲如震雷賊
懼羅拜舉酒酌曰公忠臣也吾輩無知誤公命爾軍民
聞克死號慟如喪所親宋詩紀事云紹興中爲敕令
所刪定官自號赤城居士
按酈瓊之叛在紹興七年非建炎也

風雅遺聞陳子高克臨海人元豐閒名士嘗僑居金陵
曾慥詩選以爲金陵人者誤也其詩穠麗婉轉妙有寄
託

按子高生於元豐辛酉以爲元豐閒名士非也

遺書

四庫全書總目東南防守利便三卷宋呂祉知建康府

命僚屬陳克吳若同撰書前結銜稱右迪功郎江南東路安撫使司準備差遣臣陳克

宋史呂祉傳祉字安老建陽人紹興三年知建康府祉到官與通判府事吳若安撫司準備差遣陳克共議作東南防守利便三卷上之大略謂立國於東南者當聯絡淮甸荆蜀之勢今臨安僻在海隅移蹕江上然後可以繫南北離散之心

書錄解題天台集十卷外集四卷長短句三卷臨海陳克子高撰李庚子長跋其後云刪定鄉人也少時侍運判公貽序宦學四方曾慥詩選敘爲金陵人蓋失其實今攷集中首末多在建康且嘗就試焉當是僑寓也詩

選又言不事科舉以呂安老薦入幕府得官按集有聞
榜二絕則嘗應舉矣又有甲午歲所作詩云三十四則
其生當在元豐辛酉得官入幕蓋已老矣詩多情致詞
尤工蔡按生元豐四年辛酉卒
紹興七年丁巳年五十七
花庵詞選陳子高名克天台人呂安老師建康辟爲參
議有赤城詞一卷

三台詩錄子高著有天台集赤城詞不傳江湖續集有
詩一帙皆題畫之作其餘佳句散見茗溪漁隱叢話西
清詩話及許彥周詩話中 子高工長短句陳質夫謂
其詞格高麗晏周流亞其詩胎原溫李雖肉豐於骨而
文采陸離爛焉如錦在宋詩中另爲一格

雜錄

三朝北盟會編紹興七年命呂祉節制淮西軍馬辟陳克子高爲參謀子高欣然應其辟葉夢得曰呂安老非馭將之才子高詩人非國士也勸止之不從夢得贈以詩曰解談孫破虜那厭羽征西克留其家以單騎從軍後酈瓊之變終于不免

按南宋書本此

能改齋漫錄毛友達可內翰守鎮江時賀方回以過客留寓一日陳克繼至同會於郡樓卽席克賦詩所謂徘徊臨北固慷慨俯東流是也毛稱賞曰雖杜子美不是過矣翌日賀求去毛留之且訝去亟賀曰一郡豈容有兩個杜子美二公相與大笑

茗溪漁隱叢話陳子高九日瑞香盛開有詩云宣和殿
裏春風早紅錦薰籠二月時流落人間眞善事九秋霜
露卻相宜俚俗因此詩遂號瑞香爲錦薰籠子高別有
古詩一篇意含諷刺語加微婉得騷人之體格其詩云
佳人在空谷雙星思銀河契闊不有命盛時豈蹉跎娟
娟匡廬秀如此粲者何香蜜綴紅糝寶薰罩宮羅幽窗
下團圓微風自婆娑寂寥千年初戢戢蓬艾多何階託
方便百金聘倚儺赤欄青箴舫丁寧護根窠泥沙亦天
幸扳聯入宣和誰令蘭蕙徒憔悴守巖阿宋詩紀事有
作自年作載
託作計百作千倚儺
作綺羅無香蜜十字

歸田詩話陳克子高題三品石云臨春結綺今何在屹

立亭亭終不改可憐江令負君恩白頭仍作北朝臣望
夫石云望夫處江悠悠化爲石不回頭山頭日日風和
雨行人歸來石應語二詩皆超出常格而意警拔不與
諸作同

西溪叢話子高鳥聲妨客夢花片攪春心句甚雅杜審
言詩啼鳥驚殘夢飛花攪獨愁下句爲工也子美詩樹
攪離思花冥冥其亦有所自矣樂天楞伽寺句照水姿
容雖已老上山筋力未全衰子高易爲照水姿容非復
我登樓腰腳不如人寫病起情狀宛然

遺詩

曹夫人牧羊圖

日長永巷車音細插竹灑鹽紛妒恃美人零落涇水寒
雨鬢風鬟一揮淚柔毛臙臙與人羣兒女恩怨徒紛紛
洞房那復知許事但畫遠牧連空雲解葉飄蕭晚風勁
殺慙相追寒鵲竝短童何處沙草深族走羣飛各天性
向來鞍馬曹將軍文采斑斑今尙存林下美人更超絕
新圖不作五花文

聲畫集

畫梅

溪路模糊半山雪黯淡寒梅一枝月醉眸無處認冰姿
兩袖香風更愁絕長恨飄零如楚雲夢中猶記好精神
忽逢冷豔冰綃上歎息侯家占好春誤人吹裂柯亭笛
豈有殘英落綺席始信壽陽人寫眞不知江南近消息

董端明漁父圖

鱸縷絲絲雪色魚碧筒香細到村沽江天此樂誰無分
不問官家乞鑑湖

返魂梅次蘇藉韻

三首錄一

老夫粥後惟耽睡灰暖香濃百念消不學朱門貴公子
鴨爐煙裏逞風標

少卿謝景思先生伋

孫直

赤城志謝伋字景思參知政事克家之子宫至太常少
卿知處州紹興初侍父寓黃巖自號藥寮居士有文集
葉侍郎適爲之序孫直見淳熙十一年科名

按謝克家上蔡人字

任伯紹聖四年中第建炎四年參知政事終資政殿學士紹興初寓臨海謝直黃巖人字古民歷太社令大理

司直以奉議郎通判
嘉興府並見赤城志

黃巖縣志謝伋字景思上蔡人參政克家之子官至太
常少卿紹興初侍父寓靈石名所居爲藥園後寓三童
白號藥寮居上有文集葉水心適爲序初秦檜罷相御
批云秦檜不知治體信任匪人人心大搖怨讟載路後
檜復柄用意札在伋所有旨下台州追索擇酷吏劉景
爲守視事次日卽遣吏追逮伋自分必死將抵郡城坐
舟中望景郊迎相見執禮甚恭延館美供帳置酒歡洽
蓋早已得檜訃音矣踰旬伋拜處州之命從祀鄉賢祠
謝直字古民一字希孟號晦齋伋之孫淳熙十一年進士博學
能文嘗曰行事不法周公無志也立言不法孔子無學

也有文集藏於家

三台詩錄謝直初名希孟字古民黃巖人淳熙十一年進士奉議郎出陸象山之門有時名伉直使氣與永康陳同父交爲朱晦翁按唐仲友事酒閒與同父幾失歡晚節益蹇葉水心贈詩有白頭趨幕府早已負平生之句希孟讀之爲愴然

遺書

四六談麈一卷

宋史作二卷按百川學海藝圃蒐奇學津討原俱有刻本凡五十有五則爲一卷

四庫全書總目按此書爲左圭百川學海所刊舊本卷首但題靈石山藥寮子不著撰人書錄解題載爲

謝伋撰考書中時自稱伋則其說是也伋字景思上蔡人官至太常少卿參政克家之子良佐之從孫所稱逍遙公卽良佐也其論四六多以命意遣詞分工拙視王銍四六話所見較深其謂四六施於制誥表奏文檄本以便宣讀多以四字六字爲句宣和間多用全文長句爲對習尙之久至今未能全變前輩無此格又謂四六之工在於翦裁若全句對全句何以見工尤切中南宋之弊其中所摘名句雖與他書互見者多然實自具別裁不同勑襲如王銍四六話載廖明略賀安厚卿張丞相諸啟凡數聯伋皆不取而別取其爲厚卿舉掛功德疏一篇知非隨人作計者

矣費衮梁谿漫志曰謝景思四六談麈甚新奇然載陳去非草義陽朱丞相制有語忌令貼改事又載謝顯道初不入黨籍朱震乞依黨籍例命官事皆誤朱制乃有旨令某處厚貼麻非令其自貼改謝顯道崇寧元年實曾入黨籍景思記當時所見偶爾差舛恐誤作史者採取故爲是正之云云是疎漏之處亦所不免然不以一二微瑕掩也

藥寮叢稿二十卷

見宋史藝文志文獻通考今佚

永嘉葉適序曰謝希孟示余大父藥寮叢稿二十卷崇觀後文字散壞相矜以浮肆爲險膚無據之詞苟以蕩心意移耳目取貴一時雅道盡矣謝公尙童子

脫巾髦遊太學俊筆湧出排迤老蒼而能不受俗學
熏染自漢魏根柢齊梁波流上遡經訓旁涉傳記門
樞戶鑰庭旅陞列撥棄組繡考擊金石洗削纖巧完
補大樸其藥園小畫記蓋謝靈運山居之約言志潔
而稱物芳無憂憤不堪之情也公諱攸字景思上蔡
人艱難時往來青城毀容敗服實佐其父奉傳國璽
走宋州高宗知之自用爲祠曹郎兼太常少卿垂賜
第掌誥命矣會有秦氏之厄擯落二十年始稍外遷
而公死嗟夫窮達長短不足云也王筠言未有七葉
爵位相繼人人有集如吾門者按筠雖粗有文而王
氏七葉無以文名世者王僧虔誠子姪書可見也安

得因簪笏不墜便欲文字並稱乎然亦恨其集不傳
無以驗工拙今公橐藏已久懼遂淪墮使真能文者
不見信於後此希孟之責也

遺文

四六談塵序

三代兩漢以前訓誥誓命詔策書疏無駢麗黏綴溫潤
爾雅先唐以還四六始盛大概取便於宣讀本朝自歐
陽文忠王舒國敘事之外作爲四六製作渾成一洗西
崑磔裂煩碎之體厥後學之者益以眾多況朝廷以此
取士名爲博學鴻詞而內外兩制用之四六之藝誠曰
大矣下至往來牋記啟狀皆有定式故謂之應用四方

一律可不習而知予自少時聽長老持論多矣憂患而後悉皆遺忘山居歷年飽食終日因後生之問可記者輒錄之以資讚學之一事如古今五七字話題爲四六談麈云他時有得當附益諸紹興十一年五月十三日陽夏謝伋序

曾使君新詞序 赤城集十七

臨海使君南豐曾侯惇字德父以故相孫習知臺閣工爲文辭年踰二十當全盛時官中都諸公貴人一日稱薦王邸戚里名勝豪傑莫不願交而德父亦善與人交笑言霍靡各適其意名聲一日滿京師酒酣耳熱遺簪墮珥之前滑稽放肆之詞播在樂府下至流傳平康諸

曲皆習歌之以是樂府尤著蓋識其小者輕千金重然
諾夸承平公子之豪而見其大者英妙卓絕可繼門戶
鐘鼎之盛此絃父異時之作也伋政和末肄業太學同
舍生多能語此後十四年絃父丞太府伋丞太宗正相
遇行在所敘中外契明年同出尚書省見其文詞日益
多而樂府傳者少時中外多故雖官曹令休反室無私
恩意皇暇乎朋友燕集之事哉又十三年歲在丙寅按
興十紹六年絃父來守臨海四方無事屢豐穰不鄙夷其民教
以禮樂老者安而少者懷矣於是以少日之所自樂而
與斯民共樂之變歎息愁恨之音爲樂職中和之作合
樂府五十一轉而上聞則安靜平易無煩苛迫急辦治

於談笑之間殆將於此乎政小而行遠則高下抑揚曲折變化人情物態莫不周知雖異世識其人矣既秩滿去郡門生故吏相與哀次屬黃巖長刻諸板將傳之又屬倅爲序倅應之曰曾侯知我不能度曲嘗觴我顧其侍兒誦蘇東坡前後赤壁二賦曰聽此文也畢之何敢序侯詞則又合詞來請曰是亦侯之心也固辭不獲故序其自所見聞者如上

委羽洞記

赤城集十五

台州黃巖縣南五里有岡阜連屬草木茂密其洞曰委羽父老相傳數十年前常有青衣童子戲洞口居人以滓穢溷之童因忽不見紹興辛酉

按十年今石城使君李

侯端民令茲邑暇日勸課農桑至其處始擇道士董大方主之稍給香火瓜華之用大方以符水治病疾輒愈邑人重之以是二十年閒堂殿門廡高明靚淨庫廚沐浴具體而有始變荆榛爲勝地按大洞記甌粵之閒大海之涯地產方石真人劉奉林所居也奉林嚮高逸士避周季世棲焉控鶴輕舉墮一大翮人名其山曰委羽伋寓居三童山鐘鼓相聞嘗一再至及守縉雲大方遺書求文記其事復曰我本山林主郡非好也盍俟歸及浙右又以書來曰公又渡浙而西矣歸期寧可以日月冀哉且洪農寓公重道相悅欲成茲事許列銜石上矣敢固以請乃序而爲之銘銘曰

昔有仙人卯金刀雞犬同升記阡陌九皋聲聞至今存
上天下天曾委翮仙人一去幾千載閱世真同駒過隙
長官好事繼李侯大洞主人親推擇穹隆堂殿復一新
照映林巒無夙昔寓公耆德上清都豈有宅楊畢茲石
碧落侍郎寧復來葉令飛鳧塵幾隔太乙青藜儻可尋
去其研朱點周易

藥園小畫記

赤城集十五

右藥園小畫一卷作雲林室廬人物草木鳥獸倂先世
既無盈餘且漂流轉徙不能治生產久爲祠官俸入至
薄居不敢近州縣食不敢飽梁肉於窮僻處人棄我取
粗辦一廛豕舍之旁買石田葺茅竹爲園圃辛勤十餘

年根撥皆自封植下澤款段其來無時板輿輕軒或因

分胙而至以爲草木諸果物皆藥也總而名之曰藥園

園陜小不足賦有僧了宗者來游寫以淡墨樹輪囷

此字

肌相糺林木茭飢

茂誤

藤蘿滋蔓樓閣隱於其中靈

石寺也出苔蘚山門緩步荒徑挾平頭奴載一壺酒貌

似也垂楊夾道叢篠插籬羅漢大樹映門者園也下瞰

黃甘塢後浸白蓮池池上偃蓋松紫霄諸峰羅列目下

是爲水芝軒蓬蒿數楹中楹靈泉館僧閑栖鹿於後有

坐起更衣之房是爲挽衣寮水泉甘香鄰曲汲不絕作

屋陰樹是爲潤畦亭把茅蓋頭孤鶴暮入題曰

此字補鶴

乘後望古松百章籬內巨竹滿坡面雙槐背三樟一堂

二內榜曰劖青由堂而西上薜荔階別一小邱最後得之地多薏苡

原誤作苡

不絕其本乃結草庵簷以竹瓦榜曰

明珠主人或挽衣於寮或抱甕於亭出灌諸畦或坐於堂上使童奴蘇蘭薪桂酌泉烹茶或採蓮劖藥惟意所在挾書登山山明水清人跡斷絕聞猿啼鳥鳴而已意隨事更景與時變而畫亦難盡也宗吳人筆跡甚可喜贈詩

題謝少卿藥園

朱子

謝公種藥地窈窕青山阿青山固不羣花藥亦婆娑一掇召沖氣再掇散沈疴先生澹無事端居味天和老木百年姿對立方嵯峨持此供日夕不樂復如何

小儒忝師訓迷謬失其方一爲狂瘖病望道空茫茫頗
聞東山園芝朮緣高岡瘖聾百不治效在一探囊再拜
藥園翁何以起膏肓

景思出示藥寮佳篇繼韻

晉陵孫覲仲益撰

宋詩鈔

連筒自灌黃精圃結轍休推薏苡車萬壑飛泉春午枕
一蓑帶雨荷春鋤逃名尙有身爲累擇利安知貨可居
笑指吾公門上莠一時零落已邱墟

按緒語謂秦檜

送謝希孟

永嘉葉適

水心集

白頭趨幕府蚤已負平生未放鵬舒翼應須驥歛程驛
梅催凍蕊柁雨送春聲爲語常平使開懷待子荆

遺詩

妙庭觀

台詩續錄

蕭蕭六轡天邊路雲竹風松正歲寒欲洗衰顏換凡骨
應須九轉大還丹

雲駟一去遠難追丹鼎埋光固不疑承露仙人辭漢後
幾重深杳隔瑤池

謝晦齋遺詩

見前賢小集拾遺

遣懷五首寄致道

貧者士之常富亦我所欲得常詎可厭逐欲何由足荒
哉化蝶翁微歟監河粟人生命如綫日須不盈剝俯仰
天地間何由謝羈束

時命各有遇何言富與貧有來疾雷電決去微埃塵坐

令區區者視此爲鬼神既有得失患自忘情性眞所以
首陽山昔有餓死人

君子不謀食士固食於人飢餓自有責何足煩吾神拂
几展我書熟讀困蹇屯義文與周孔可鑒道屈信歎歎
眼中事悠悠塵閒身

生當益於人爲道固不同賜也乃結駟回也乃屢空憶
昔年少壯未知理窮通收身百憂餘自置寂寞中餽粥
儻可繼當爲七十翁

在昔營居巢首尾三十年高鄰念羈旅分我佳林泉自
從倉幕歸亦買半頃田坐念顏太師粥竭祇益煎不如
邊孝先晝眠腹便便

辰十月八日同希周掃墓靈石晚步松下愴然有懷以
數詩示兒姪輩邀希周同賦時阿同在新城他日當寄
之

寒光轉南陸夕景上喬木層柯蔭脩徑疏密散金綠緬
懷載酒人蘿蔓記遐躅行行出林表煙莽際童牧時有
種麥兒揮鋤電翻覆

老樹誰所栽及茲上交蓋崢嶸仰巨樟秀發憐稚檜悠
然攪心思慨我百年外我懷引以長天色慘欲晦投牀
聞夕鐘擁衾不成醉

長懷邴曼容遠慕蘧伯玉養志則安能寡過亦所欲邈
哉誤儒冠坐使衣食促羸書不論金終身未易讀灑掃

慚老僧日食纔一粥

先公爲直言蔡林古無書家貧賣窗箔編籀聚所餘取
之寫文字瑣細行蟲蛆遂令後奕世衣冠出門閭今爲
執政孫學與不學歟

小夫智解短錐刀競其身養志與養體孰爲能事親堂
堂父母軀浩浩仁義貧此貧不以道此樂豈非眞我知
我天分人言葛天民

昔在井田日一民本非四農隙或工商其秀乃稱士是
知桑禾閒可以寄書史時非長桀耦時得伊傅事卒歲
優游哉吾道甚簡易

淵明眞學者餘事聊爲詩我讀命子篇愴彼已焉辭後

來杜陵翁自笑身長兒我昔過庭日教誨真嚴師哀哀
蓼莪淚灑灑墳樹枝

長懷際天淵短懷在眉睫吾門起典午台徙今五葉中
原氣象屬前輩風流接奈何不竟書而欲事作業感此
懷短長賦詩寫習舊

知州李子長先生庚

赤城志人物門紹興十五年劉章榜李庚臨海人字子
長歷御史臺主簿監察御史兵部郎中繼奉祠提舉江
東常平知南劍撫二州後知袁州未上卒有集號諭癡
符樓參政鎬爲之序

台州札記書錄解題諭癡符二十卷御史臨海李庚子

長撰庚乙丑進士以湯鵬舉薦入臺家藏書甚富樓攻
媿序其集云少年筆力絕人部使者以牋翰委公從容
泛應無不曲當時余伯父揚州爲漕使公首以長牋進
謁有曰衰懷錯落有秋風鱸膾之思舊學荒涼無春草
池塘之夢伯父一見擊賞延爲賓客不復以僚吏遇之
余倅丹邱始得拜公之門公方買屋近郊古木交陰庭
草錯列若隱士居聚書數萬卷於樓上閉門不與人通
老矣猶沈酣其中里閭罕識其面 又云海邦貨魚于
市者夸詡其美謂之詒魚字書以爲詒街賣也顏黃門
之推家訓曰吾見世人至無才思自謂清華流布醜拙
亦已眾矣江南號爲詒癡符公之意蓋出于此特謙詞

耳

三台詩錄子長嘗集天台題咏詩二卷吾郡詩之有傳

子長首功也

蔡按天台集本子長所輯林竹村父子繼之固當推爲首功

雜錄

李撫州

庚

輓詞

四明樓鑰大防

攻媿集

與物初無忤臺評反謂傾磨符成漫仕林壑寄平生
踈履嗟何晚揮犀空復情天台隔風浪無地拜佳城

李下真無徑門前可設羅詩如翰林逸書似鄴侯多奇
字今誰問遺編尙不磨從來好哀輓薤露忍興歌

阜歲文聲振長沙見賈生積薪看晚輩推轂致名卿
子舍真連璧生涯付短檠風流今李漢極口贊冰清

遺書

詒癡符二十卷

文獻通考陳氏曰御史臨海李庚子長撰詒之義衙賣也市人鬻物於市誇號之曰詒此三字本出顏氏家訓以譏無才思而流布醜拙者以名其集示謙也庚乙丑進士以湯鵬舉薦辟入臺家藏書甚富

詒癡符序

四明樓鑰

客有以書一編示余曰此赤城李公察院所爲詩文名曰詒癡符公亡矣莫曉其名書之意余曰公於書無不讀此名殆不苟也海邦貨魚於市者夸詡其美謂之詒魚雖微物亦然字書以爲詒衙賣也顏黃門之推作家

訓曰吾見世人至無才思自謂清華流布醜拙亦已眾矣江南號爲吟癡符公之意蓋出於此特謙詞耳公諱

庚子長其字也少年筆力絕人始爲長沙尉一時帥守

部使者傾待之皆以牋翰委公從容泛應無不曲當時

余伯父揚州爲漕使

蔡按鄞縣志樓璉字壽王一字國器以父異任得官歷湖南轉運判

官紹興二十五年遷知揚州明年致仕

公首以長牋進謁有曰衰懷錯落

有秋風鱸膾之思舊學荒涼無春草池塘之夢伯父一

見擊賞延爲賓客不復以僚吏遇之湯公參政時帥湖

南後爲中司遂辟公檢法官遷六察爲郎而歸自此三

數十年閒僅一再以麾節出終不得爲文字官以展究

所長識者恨之余倅丹邱始得拜公之門公方買屋近

郊古木交陰庭草錯列若隱士居聚書數萬卷於樓上
閉門不與人通老矣猶沈湎其中里閭罕識其面閒與
人接雖微賤必與之抗禮後生有以經史叩請隨卽響
答詩文晚益高時出一篇卽日傳誦哀挽之作尤爲悽
惋真可以泣鬼神也公之子澐因求余敘其首余度公
所著甚多猶有遺者更搜故橐盡出而行於世以慰其
平生筆硯之功則箕裘可以不墜矣陳子高克台人也
詩名已久而所傳不多公嘗盡其遺逸者板行於江右
視舊殆過倍蓰而子高之詩益顯公亦將以此望於後
人乎然讀此編者亦足以知公之所存矣

天台集原本四卷

按前集二卷續集二卷乃李庚原本林師藏各增一卷其子表民又輯前集別編一卷續集別編六卷共十三卷見四庫全書總目載卷五十九林師藏下李兼序則載此備參考焉

天台集序

郡守宣城李兼撰

州爲一集在昔有之近歲東南郡皆有集凡域內文什彙次悉備非特夸好事資博聞也於其山川土宇民風士習互可考見然則州集其地志之遺乎天台以山名州自孫興公賦行江左迨今千禩大篇畚畚短章寂寥未聞省錄之者予來經年思會粹爲一編書願無其暇方延諸儒議修圖謨謂茲尤所先急一日州士李榮昆

仲按樓序則其一名湧出其先公御史所裒文集四秩以爲貺已

而州學諭林師蒧又示唐宋詩三百餘篇於是摭取前代之作刪重補佚而增其未備爲賦三詩歌行合二百梓而刻之自餘續集傳焉嗚呼亦可以爲富矣不出戶庭而盡睹山海之勝不費探討而坐獲巾笥之藏天下之事成於志其理固然未有若是之捷且速也圖謀雖未亟就觀此集思過半矣嘉定改元重五後一日宣城李兼序

遺詩

雙巖堂

吾州山水窟城郭擁寒綠戢戢羣峰閒峙此一雙玉相

對如佳賓可望不可瀆空翠撲衣裳夜來雨新沐

霞起堂

赤城古洞天彤霞照山谷爛爛九光垂餘輝借草木伊
予有痼疾企望常不足待與馬鍊師耘芝灌松竹

題畫扇

睡起小樓春又殘半垂雲袖傍闌干楊花飛過秋千索
一陣東風作曉寒

戚鶴泉云袁州詩洗刷明秀曾茶山所謂句律清於
庾義城者三詩約略可見

殿撰彭大老先生椿年

兄龜年

赤城志紹興二十七年王十朋榜彭椿年黃巖人字大

老龜年之弟歷國子監主簿編修官提舉福建市舶知處州太常丞吏部郎中國子司業江東轉運副使終右文殿脩撰事見商侍郎飛卿所爲行狀有雜稿藏於家又紹興二十一年趙逵榜彭龜年黃巖人字元老嘗中教官與弟椿年號二彭歷常德府僉判終朝請郎子藻今知臨江軍

按今謂嘉定中陳氏修志時也

黃巖縣志彭椿年字大老龜年之弟紹興二十七年進士初知蘄春縣梁丞相克家薦之未用而梁去椿年卽詣簿注松溪時相聞而愧之奏除國子監主簿參政龔茂良復奏曰臣備位丞弼每見朝士希進獨彭椿年退然不營遷樞密院編修官有私於椿年者曰閣長致意

指日有峻除椿年曰不識閣長正恐誤耳歷提舉福建
市舶知處州太常丞吏部郎中領國子司業黜浮崇雅
文風一變後爲江東轉運副使以祕閣修撰致仕賜三
品服終右文殿修撰臨海商侍郎飛卿狀其行有雜橐
藏於家 又彭龜年字元老邑東人博貫經史嘗中教
官後登紹興二十一年進士歷常德僉判終朝請郎與
弟椿年俱有文名號二彭子藻知臨江軍

遺文

禹貢論序

經義考

淳熙六年提舉福建市舶時作

禹迹所及周遍天下而載之禹貢者僅餘千言其施置
闕大而書法嚴簡絕非一見可以遽解故薦紳先生難

言之漢永平閒詔遣王景治汴而賜以禹貢圖曰圖云
者爲其道里悠遠功緒汗漫故圖以著之則禹貢有圖
其已久矣予嘗恨古圖不存歷世諸儒耳受臆決無所
稽據每對禹貢輒闕然不滿紹興初肇復太學與今泉
守程公偕冠而中弟子員俱業書又適同一舍每相與
談經至不安處輒共歎諸儒之說未能貫通時方事場
屋作舉子文字未暇究竟也淳熙四年程公以侍從講
尙書禁中門下省頒行其奏劄曰禹貢大川七而諸儒
沿襲乃譌其六予聞之有會於心而疑其是正之難也
已而聞上御講殿問黑水甚詳知公有見俾之來上程
公具以其所知爲書以奏上見之大加褒勞詔付祕書

省藏以垂後予聞諸學士大夫稱其精博實未嘗一見其書也六年出管閩舶明年而程公以敷文閣直學士來鎮泉南暇日論文因請觀之程公欣然出副本相示予取以歸熟而復之則其書條理甚備辨正經指者著之於論論凡五十有二論常指事說理而當證以山川實地者則事爲之圖圖三十有一至其事不隸虞夏而源流本出此經者則又爲後論八篇數千年閒州域更革山川迹道率皆本禹語以爲之宗而後采取歷世載籍以爲之證其所據謂是者必其協諸經而協乃始皆措而其救正前人違誤者亦皆稽案經語而執規矩以格方圓其不合者有狀而指自出若語也至於執以爲

據者惟輿圖史志之所載兵師使驛之所經實有其地
甫以立辨至於稗說怪語奇聞異教荒忽誕謾不可案
核者悉棄不取嗚呼亦勤矣而無一語不從禹貢以出
予乃知眾稱精博者不誣也若九河之淪於海三江之
當爲一嘉陵江誤爲西漢而漢中之漢本無二派濟水
通溢爲滎而濟之爲濟實非潛行地下弱水之旣西黑
水之入南歷世禹河漢河之別貢道入河入荷之誤以
其言而質之禹貢若合符節無所差爽予始念孟子之
言曰天之高也星辰之遠也苟求其故千歲之日至可
坐而致也程公之於地理禹迹可謂求之而知其故也
矣是可傳也且其奏御之語曰東西朔南漸被聲教皆

自此規摹以出則其拳拳不獨爲夏世故書發語而已
聖天子亦旣知其志之不狹矣從而褒諭之曰禹貢於
古今山川地理無不該貫最爲難明卿著論以要其歸
爲功甚大則所得褒寵亦不止義訓之近也郡博士陳
君應行請以其著刻木郡庠布之學者而求予文爲表
予不容辭故爲之書

重脩黃巖諸閭記

紹熙甲寅

浙江通志

黃巖爲壯邑境之瀕於海者率三之二故其地勢斥鹵
抱山接塗川無深源易潦易涸非資於畎澮之利不可
也官河貫於八鄉爲里九十支涇大小委蛇曲折者九
百三十六其洩水至於海者古來爲埭凡二百所足以

蔭民田七十餘萬畝元祐間羅公適持節本路因其埭
之大者建置諸閘今之黃望石湫永豐周洋皆其遺跡
也歲月滋久前後興修者往往功力不至隨成隨壞遂
謂諸閘終不可建惟漕運幹官謝敷經鄉士支汝績陳
謙徐弗如陳緯深知其利病淳熙間考亭先生朱公及
西蜀句公昌泰相繼爲常平使者按行田野憫閘事不
修於是用其謀請太府錢及出度僧牒爲直一萬四千
緡句公又自以本司錢六千緡成其役乃檄寧海丞永
嘉林季友邑丞四明劉友直董其事又委士人分領之
武學博士蔡鎬於規模條畫尤所究心自甲辰春首役
至乙巳孟冬訖事所建者六回浦金清長浦鮑步蛟龍

陡門是也增修者三黃望周洋永豐是也連歲之閒民
享其利追念先賢始事之勤相與築堂肖像而祠之所
以報也歲在甲寅提舉李公謙以永豐之閒又復廢淤
從而新之用是敘其始末以告來者

重修興善院記

清熙丙申

黃巖縣東南三里有山曰九峰林木邃茂巖壑環峙蓋
自韶國師度土奠基而澄觀老啟宇聚徒是爲興善院
焉二百餘年徒弟住持以奉香火至宣和閒魔寇搶攘
焚蕩一空旣而草創訖無成就紹興之初始更爲禪不
五年閒三易主僧莫能起廢土俗愍焉遂請於郡去禪
歸律復命講人主之自此稍稍歸嚮紹興戊寅之春法

席旣虛講人文異退食□興歸於故里律行精謹教觀
通明嗣承天□□證悟之學邦人素所欽信於是檀越
車軫與邑民咸曰可爲興善得人矣乃疏名請於郡侯
沈公名介公從其請文異道心旣堅緣力允契遠近嚮慕
事功響合乃捐已得施利仍率眾力首架溪梁覆以亭
宇清流下瞰林巒倒景而氣象已宏矣至於三門兩廡
雲堂塔院轉輪之藏香積之風咸殫而新之惟釋迦殿
工力未就會紹興壬午之秋震風拔木咸施巨材不二
年而輪奐燦然又得同衣惠深傾衣鉢募有緣嚴飾佛
像悉已具備淳熙改元春事告興雨澤愆期邑大夫孫
公名叔豹默禱觀音卽有感格乃謂其民曰臨安有上竺

紹興有圓通丹邱有白塔皆菩薩顯應之地黃巖雖大
邑未聞有之惟興善谿山明秀可建道場乃審天竺梵
相而造飭之命文異建殿以更奉之而興善遂永千古
而文異二十年住山勞績不虛捐矣宋淳熙三年十月
六日

贈詩

送彭大老提舶泉南六首

餘姚孫應時季和撰 燭湖集

先生學力定如山應世無非意所安一語令人深味處
不言容易祇言難

笑談終日任天真和氣春風自絕人畢竟胸中無適莫
不妨一世總相親

人言西府厭編摩歸臥方山意若何出處無心亦無累
寧知世上有風波

眼觀榮辱等虛空強著衣冠與世同長夜清風秋夜月
高懷應不忘山中

天然廉素匪沽名秋入滄浪徹底清蠻舶珍奇縱山積
歸囊應比去時輕

一時人物到如今人望先生日已深願以蒼生真懷抱
弗因空谷有遐心

學士宋伯嘉先生之瑞

赤城志隆興元年木待問榜宋之瑞天台人字伯嘉歷
宗正祕書丞吏部司封郎官都大提點院治吏部郎官

樞密院檢詳文字大理少卿提舉福建常平陞提點刑
獄祕書少監中書舍人知寧國府華文徽猷閣待制知
江陵府龍圖閣待制寶謨閣直學士今以光祿大夫致
仕次子濟今知湖州

齊東野語濟王玆出封宛陵辭不就徙寓於雲城之西先是天台宋

濟爲守日更立諸坊扁其左題曰守臣宋濟立未幾變作或以爲先謙云按府志作濟之誤

天台縣志宋之瑞三里人字伯嘉博洽經史爲文立就
嘗修天台圖經有文集藏於家今亡見會通記

四朝聞見錄孝宗喜占對宋之瑞面對上問以所居之
瑞對曰臣家於天台上又曰聞彼多名山勝利孰爲之
冠之瑞對曰唯是萬年國清上大加賞歎之瑞遂階兩
制云

遺書

天台圖經

浙江通志大中祥符間修見宋之瑞天台圖經自序按祥符圖經舊志也之瑞所修則在

嘉泰元年

天台圖經序

三台文獻

天台僻居海嶠以古不名佳郡往往爲逐臣禦魑魅之地暨皇朝聲教遠被乃稍列于中州翠華南渡密邇行都始爲輔郡然而氣鍾神秀僊佛所宅洞天福地殆與蓬萊方丈相埒其著稱自昔又不可掩者之瑞弱冠游太學先是未嘗一登勝踐或有問者輒口噤不能對私竊歎曰司馬遷徧游天下名山大川而吾居是邦曾不能出戶庭少迂杖屨是可嗤矣曩歲居憂多暇遂與一

二釋子窮探極詣不憚爾足凡高僧逸士之所棲隱騷人墨客之所賦詠斷碑殘刻靈蹤異狀隨筆之紙歸而參以祥符圖經所載殊略蓋是時委官會粹急於趣就矧距今垂二百祀其戶口之繁庶賦入之增益與夫人材輩出區宇創見自應月異而歲不同矣於是門分彙次粗成一編惟荒誕不經者削去弗錄姑以便覽觀而資問答藏之巾笥有年矣邑宰毗陵丁公大榮博雅好事一日訪予深以圖經未備爲闕典因出是編示之欣然抵掌卽荐續近事尋命鋟梓昔與公蓋嘗賦天台矣第不過馳神想像故辭雖富而事不核今具得於耳目睹記詳而非虛意者可以傳信乎庶俾懷青霞之致者

聞其名而不及見一開卷而盡得之乃若蒐補遺放則猶有望於後之人嘉泰元年二月望日序

遺文

助濟倉記

赤城志助濟倉在天台縣西七步嘉泰元年令丁大榮建宋閭學之瑞爲之記文見府

志

國家惠養元元故詔天下郡縣置常平義倉爲凶荒備法至善也第後之爲令者迫于簿書期會往往先催科而後撫字追呼鞭箠窮日夜之力猶懼勿給幸而集事則世指爲能吏其甚健者則肆爲推剝務求增羨藉以供苞苴而飾廚傳尙奚暇憂深思遠以遺後日之利益哉毘陵丁君大榮天資開敏勇于立事始至茲邑新縣

庠闕公宇與梁濟涉細大畢舉邑介冠蓋之衝丁夫困于差役殆無虛日白郡亟免人以奠居公曰是第見吾始辦目前耳曾蔑寓吾經久惠民之意深惟茲邑地褊民貧富室素罕蓄藏歲一不登饑民嗷嗷率仰食縣官公庾賑乏所出有限令雖惻然疚懷而搏手無策其勢決致流徙因痛節浮費一載有奇除用度外贏三千緡乃預于縣側創屋十間以助濟名會鄰邑大熟遂糴穀三千二百石以實之仍括責公田逋租歲可百石脫遇旱嘆雖未能蠲以予民而裁價賤糶式遏翔湧庶幾子平循環長有餘蓄以爲常平義倉之助其措畫如此議者謂公之用心信美矣如後繼何某竊謂士大夫孰不

慕爲仁而不安于忍，倘坐視民瘼如秦越之肥瘠，眞忍人矣。大概當官臨民，亦盡吾心焉耳。如慮後人之墮廢而內沮中輟，則動輒退縮，抑何事之可爲？是舉也得公用心，且以占公異日官愈高，則及物愈廣矣。烏可以無紀？嘉泰元年十月日，宋之瑞記。

仁眞亭記

三台文獻

石梁勝冠台隴寔五百應，眞示現之地。故其下龍湫特靈，遇禱輒響。答第山徑，境塉披蓁，取道往往就巖花亭，望拜從高瞰下於禮弗虔。去歲冬十一月，縣令丁大榮始至，展謁顧瞻，惕然乃捐縣帑百千，委住持萬年寺僧智海卽潭之隙，度地建亭，榜曰仁眞。於是夷險鋤荒，護

以欄楯今年夏五月不雨種猶未入土令集緇黃躬詣
新亭伏謁致拜告啟未竟忽有龜大如覆孟出沒波面
已而投刺下墜若有物掣而取之觀者駭異須臾龜復
出遊遂迎以歸越二日雨大霧霽四郊霑足稚耆歡喜
莫不感神之休頌令之德願刻山石以垂永久之瑞竊
謂山水佳處居官類多築臺抗榭務爲遊觀斯亭之建
意獨不爾矧中孚之信尙及豚魚宜乎淵潛效靈厥應
昭焯是可書矣舊傳石梁側有蓋竹洞天湮沒踰二百
年往歲何公偁持節蒞按嘗夢遊其地訪求不獲是行
也令窮探偶得之洞深可二丈餘中有二峽穹窿幽邃
下視攢峰疊嶂如列畫屏又得曇猷厥初修道遺址於

蕪穢蒼莽中見謀剏亭以嚴奉事而易置今庵爲龍君
祠一旦天地祕藏軒豁呈露以是知境不終晦待人而
顯故并書之

遺詩

石梁二首

石梁橫亙不知春閱盡憧憧幾許人正使更無蒸餅礙
可能前路絕荆榛赤城志石橋卽五百應真之境相傳
爲方廣寺昔僧曇猷欲渡梁訪方廣
忽有石如屏梗
之舊號蒸餅峰

應緣心在已心空方廣那知只此中金雀茗花時現滅

不妨遊戲小神通赤城志凡往來人供茗乳花效應
或寶炬金雀靈蹤梵響接於見聞

雪巢林景思先生憲

赤城志林憲奉符人字景思中特科監西嶽廟乾道中
隨妻祖賀參政允中寓臨海號雪巢先生有詩集行於
世事見尤尙書表陳參政駢樓參政鏞楊閣學萬里序
記

宋元學案林憲字景思魯人也初寓吳興後寓臨海從
徐惇立遊工詩學韋蘇州尤延之楊廷秀嘗極稱之所
著雪巢小集二卷先生貧甚媚于賀氏顧辭匱田不受
則有得于和靖之教者矣按徐度字惇立睢陽人太宰處仁子官至吏部侍郎寓居吳興之弁山尹和靖門人也

雜錄

雪巢記

無錫尤袤延之撰

赤城集十五

吳興林君景思寓居天台城西之蕭寺破屋數椽不蔽
風雨榜其燕坐之室曰雪巢日哦詩於其間客有問君
所以名巢之意君曰天下四時之佳景宜莫如雪而幻
化變滅之速亦無甚於雪者方其凝寒立水夜氣蟲蟲
紛紛皓皓萬里一色瑤臺銀闕亦現於俄頃閒然朝陽
晞暉則向之所覩蕩然滅沒而不留矣自吾來居天台
時王公貴人比里而相望朱門甲第擊鐘而鼎食童顏
稚齒羣聚而嬉戲今未二十年其昔之貴者則已死向
之富者或已貧而往之少者悉已耄回視二十年直俄
頃爾其幻化變滅之速不猶愈於雪乎知其非堅實也
於其俄頃起滅之中乃復顛冥於利害交戰於寵辱汨

汨至於老死而不自知非惑歟今吾以是名吾巢且將
視其虛以存吾心視其白以見吾性視其清以勵吾節
視其幻以觀吾生則知少壯之不足恃富貴之不足慕
貧與賤者不足以爲戚非特以此自警而且以警夫世
之人使凡游吾之巢者躁者可使靜險者可使平而污
者可使之潔不亦休乎余聞而歎曰浩哉斯巢雖方丈
之地其視廣廈萬閒而不與易也夫樂莫樂於富貴憂
莫憂於貧賤然有馬千駟不如西山之餓夫紆朱懷金
不如陋巷之瓢飲孰知乎匹夫之樂有賢於王公大人
之憂畏也哉世之附炎之徒方思炙手權門焦頭爛額
而不悔求而不得則躁得而患失則戚戚與躁相乘則

心火內焚日夜焦灼聞君之風亦可少媿矣君少嘗從
高僧問祖師西來意又於方士得養生術其清玉潔其
真竹裂其窮不堪忍而其樂侃侃然余來天台始識君
一見如平生歡時方困郡事卒卒無須臾閒每從君語
輒爽然自失顧視鞭扑滿前牒訴盈几便欲捨去今得
歸休林泉之下每一思君發於夢想則雪巢之境恍然
在吾目圍中矣因述君之說使書於其壁以爲之記

林景思雪巢

樓編

四時不皆雪陸居本非巢高人興寄遠表此一把茅吾
非二祖可夜立寒齊腰吾非鳥窠師結廬置樹梢白日
照我心不以見睨消兩腳踏實地風雨無漂搖作詩窮

益工寒瘦逼島郊落筆句驚人不復尋推敲客至不問
誰淡若君子交直氣干霄上下視鄙斗筭富貴頃刻花
疇能等幻泡附離如幕燕自謂漆與膠先生閱世熟兀
坐山城劫春陽會有時豈曰終繫匏錫山寄雄文凜然
豎髮毛我非敢言詩爲君聊解嘲

遺書

雪巢小集二卷

今佚

雪巢小集序

尤袤

赤城集十七

余友林憲景思吳興人年少時卓犖有大志賀參政子
忱奇其才以孫女妻之臨終復與田數百斛謝不取賀
既亡挈其孥居蕭寺屢瀕於餒而不悔讀書著文不改

其樂頃嘗從賀使虜同行中後有鼎貴者會赴大比試
來都城因游西湖上新貴人於馬上覘識之使人傳言
請見亟遁去其操守如此獨喜哦詩初不鍛鍊而落筆
立就渾然天成無一語蹈襲如柔櫓晚潮上寒鐙深樹
中汲水延晚花推窗數新竹中夜鵝鶩喧誰家海船上
唐人之精於詩者不是過一時名流皆願交之若徐惇
立芮國器莫子及毛平仲相與爲莫逆其後諸公凋喪
略盡君亦連蹇不偶至無屋可居無田可耕其貧益甚
其節益固而其詩益工嗚呼士患無才而有才者困窮
類若此豈發造化之祕天殆惡此耶抑嘗謂富與貴人
之所可得而才者天之所甚靳景思取天之所甚靳者

多則不能兼人之所得固宜然則才者實致窮之具
人何用有此而天亦何用靳此此未易以理曉也君所
居室名曰雪巢嘗屬余記之故其詩若干篇自號雪巢
小集云

雪巢集後序

吉水楊萬里延秀撰

赤城集十七

雪巢小集天台林憲景思之詩也梁溪先生尤延之既
序之矣景思復徵余序其後景思之詩似唐人信矣延
之之論也然至如羣花飛盡楊花飛盡無可飛
天空霜無影等句超出詩人準繩之外其遐不可追其
卓不可跂矣使李太白在必一笑領此句也似唐人而
已乎然延之深愛景思之才而深惜其窮至謂豈發造

化之祕而天惡此耶又謂富貴者人之所得而才者
天之所甚靳旣取所甚靳則不兼其所可得又謂才者
致窮之具人何用有此而天亦何用靳此又未易以理
曉者余嘗摘此語以喑景思曰子何必以才而致窮耶
子何必發天之所祕而逢天之所怒耶子何必爭天之
所靳而不取人之所得者耶景思笑曰子不見唐人
孟郊賈島乎郊島之窮才之所致固也然同時之士如
王涯賈餗豈不富且貴哉當郊島以飢死寒死涯餗未
必不憐之也及甘露之禍涯餗雖欲如郊島之飢死寒
死不可得也使郊島見涯餗之禍涯餗憐郊島乎郊島
憐涯餗乎未可知也子不見本朝黃秦乎魯直貶死宜

州少游貶死滕州而蔡京王黼相繼爲宰相貴震天下
當黃秦之死王蔡必幸其死及王蔡之誅黃秦不見其
誅使黃秦見其誅亦必不幸之也然黃秦不幸王蔡之
誅而天下萬世幸之王蔡幸黃秦之死而天下萬世惜
之然則黃秦之貧賤王蔡之富貴其究何如也且彼四
子之富貴其得者幾何而今視之不啻如糞土而此四
子之貧賤所得者如此今與日月爭光可也然則孰可
願孰不可願乎亦未可知也今吾不才豈敢擬郊島黃
秦而吾之窮有甚於郊島黃秦吾何幸得與郊島黃秦
同其窮而不與涯餽王蔡同其達而子爲我願之乎且
吾與詩人同爭夫天之所靳是天之橫民也同犯夫天

之所惡是又天之橫民也治橫民者宜以橫政旣與詩人同爲橫民又不欲與詩人同受橫政可乎余賀之曰子旣無遺力以取所靳無懼心以犯所惡無怨言以安所致然則延之爲君惜延之過也余舉延之語以唁君亦過也然君必欲專享詩人所謂才之所致者而不顧來悔以不辭造物之橫政亦過也子盍持此語再見延之爲余問之

雪巢詩集序

四明樓翁大防撰

玫瑰集

淳熙五年余自刪定郎贅倖丹邱始識雪巢林君景思行誼高潔骯髒不與世合環堵蕭瑟忍窮如鐵石一郡人士稱重之讀其詩恍然自失愈叩愈無窮身雖未達

而以詩聞於諸公閒於是遂初尤公尙書誠齋楊公待制俱爲之序此可以不朽矣一日寫數十百篇遺余又使序之余曰二公已序何待於鑰景思笑不答而請不已余啞然曰吾知之矣君詩出入古今作者門戶善備衆體二公極力稱道猶有未及者詩之衆體惟大篇爲難非積學不可爲而又非積學所能到必其胸中浩浩包括千載筆力宏放閒見層出如淮陰用兵多多益辦變化舒卷不可端倪而後爲不可及君蓋於此有得者如羅漢嶺頭羅漢樹楊花飛後無可飛等篇直欲與漢陂行茅屋爲秋風所破歌相周旋君豈欲余之及此乎景思捧腹久之曰吾於此非曰能之而願學焉子何以

得余心吾行於世五六十得此於人者蓋寡因相與
劇論詩家事不知更僕之久酒酣欲去遂書以遺之
遺詩

台州兜率寺二首

台詩續錄

春江潑天明蕭寺踞山塢荒階下鳥雀古木颯風雨徐
行石苔花徙倚望江渚日暮山更寒簷樓鈴自語
寺門瞰南江江勢浩相向風雲互吐吞山色豁林莽潮
頭捲飛煙白雨挾春漲中夜鵝鶩喧誰家海船上

梅花

全芳備祖一

野梅空山中正爲照人開如何綠窗底疎影帶蒼苔頗
似古君子無人自不諧竹徑酒初醒一信清香來

白學統卷五十五

台學統卷五十六

黃巖王 蔡輯

吳興劉承幹校

詞章之學三

提刑徐淵子先生似道

赤城志人物門乾道二年蕭國梁榜徐似道黃巖人字
淵子歷官告院知郢州太常丞禮部司封郎官起居舍
人權直學士院遷祕書少監終朝散大夫提點江西刑
獄自號竹隱有文集藏於家

宋史刑法志江西提刑徐似道言檢驗官指輕作重以
有爲無差訛交互以故吏奸出入人罪乞以湖南正背

人形隨格目給下命於傷損去處依樣朱紅書畫唱喝
傷痕眾無異詞然後署押詔從之頒之天下

貴耳集竹隱徐淵子似道天台人韻度清雅買硯詩云
俸餘宜辦買山錢卻買端州一硯瓢依舊被渠驅使出
買山之事定何年游廬山得嶰詩曰不到廬山孤負目
不食螃蜞孤負腹亦知二者古難并到得九江吾事足
廬山偃蹇坐吾前螃蜞郭索來酒邊持螯把酒與山對
世無此樂三百年時人愛畫陶靖節菊繞東籬手親折
何如更畫我持螯共對廬山作三絕淵子爲小蓬朝聞
彈疏坐以小舟載菖蒲數盆翩然而逝道閒爭望若神
仙然

風雅遺聞徐淵子似道有雋才見知周丞相必大戴石
屏師事之楊誠齋品藻中興以來諸賢詩賞其煖分煨
芋火明借續麻燈及客路三千年五十向人猶自說歸
耕之句餘詩文爲名賢著錄甚夥夜泊廬山詞最清拔
爲羅大經所賞又有廬山得蟬詩豪曠真才人之筆

與徐郎中似道書

餘姚孫應時

燭湖集八

違遠清風歲月如許然夢寐依依猶若在竹所持蟹螯
時也人事幾變參辰相望齒髮日凋愈深話舊之思自
承擢官帝城久欲奉書相慶縛身劇邑膏火煎熬恩恩
不果便中乃蒙先以手札不意塵濁蕪沒之蹤而當世
名流亦猶不我忘也忻躍感激如何可言頃聞太和佳

政專用藏富於民之意公堂觴詠正作山谷道人後身如僕固無此段風流萬分之一何當使僕亦得引例以告臺府耶清明高雅之姿瓌妙卓越之文給札視草階升自茲歎慕下風日日以俟略此展謝梗概伏紙惓惓遺集

後村詩話徐淵子有竹隱集十一卷多其舊作暮年詩無梓本才氣飄逸記問精博警句巧對殆於天造地設略不載人喉舌品在姜堯章諸人之上

太平縣志竹隱名著一時詩文散見於鶴林玉露困學紀聞等書甚多劉後村摘其警句爲圖遺集失傳今江湖集呈進本有其一卷餘姚黃氏錄藏

遺詩

九日

衰容不似秋容好坐上誰憐老
孟嘉牢裹烏紗莫吹卻
免教白髮見黃花

鶴林玉露

偶題

老去功名不挂懷高眠之外祇清齋
偶因種竹便多事
風葉埽餘還滿階

詩家鼎鑪

蓴羹

千里蓴絲未下鹽北遊誰復話江南
可憐一筍秋風味
錯被旁人舌本參

全芳備祖

送春

圓蒲相將結僧夏荷葉蒲茸綠相亞浮花浪葉自飄零
小院迴廊正瀟灑葉如青幄花成茵細腰起舞來送春
紙光如銀墨如漆落筆四座驚有神輕衫短帽付餘子
花前醉倒輪閒人

同上

舟行

大官連檣十萬艘小官僅得一葉如漁舫其中何所有
白髮翁媪并兒曹赤腳婢三後執爨蒼頭奴子前操篙
元眞筆牀閒茶竈吏部酒杯兼蠚螫書緘一箱半魚蠹
詩束百軸成牛腰平鋪橐秸薦貓犬賸買棗栗供猿猱
新花鬱屈作菱木清酒搖蕩成濁醪篷低日覺巾角折
竈近時聞羹釜轅高驤正難望鷁首緩進豈敢爭龍標

全家窟拘歎踟躕長物屏當隨週遭桑樞駟馬各是累
人肝薇蕨俱成饗不須彼此更相笑未必鬱林之石賢
胡椒後村詩話

虞仲房司馬遊園約予不赴因次其韻

祕書行處有歌鐘身在名園錦繡叢試問高吟梁苑雪
何如其快楚臺風人鷗不去機方息魚我相忘樂未窮
待得芙蓉濯雲錦弄花翻水與君同赤城詩集

自笑

黃昏茅店帶星入清曉竹輿蒙露行客路三千年五十

對人猶是說歸耕

東甌詩集
以上宋詩紀事

投平園周益公

翰林帳下飲羊羔客子騎驢渡灞橋莫似雲黿笑浮蟻

戴山負粟各逍遙

梅磧詩話平園周益公在翰林苑時天台徐淵子似道投詩云云後淵子仕

亦至翰林直院

宿雲巖 二首錄一

殘僧入定夜堂寂獨客不眠山月高靜坐了無塵俗態

一燈窗下讀離騷

三台文獻
以上黃巖集

海棠

子美無詩到海棠酒邊遊戲略平章日烘不睡都成睡

風暖無香卻自香花事一番勞應接春光強半被分張

速來窠上尋徐老同醉花前作楚狂

全芳備祖下並同

桂花

重重簾幙護金猊小樹花開逼麝臍寒色十分新軫粟
春心一點暗通犀香延棋畔仙人斧影駐鐙前太乙藜
從此再周花甲子伴公長醉玉東西

楊梅

火齊無光荔實員未嘗先說齒垂涎喚回天竺三年夢
參透披雲一味禪

竹

廬仝茅屋面桃李杜老草堂依柳梅我欲四時相照映
小窗特對此君開

酴醿

紛紛紅紫落莓苔帶月和煙特地開疑是玉妃新浴出

翠雲梯上舞風臺

水仙花

天然初不事鉛華此是無塵有韻花
翠帶詎容縈俗客金杯只合勸詩家

林下清風自一家稍親梅竹近蘭芽
只緣羞與凡花伍移植名園不肯花

薺

萋萋牆根薺采掇盈一簪破臼半浮糝
殺青微下鹽長貧歎亦苦積悟覺尤甘
緬想拔葵者吾今已傷廉

蓴菜

堆盤縷縷又秋風客俎薺鹽一洗空
羹膾疑居舵樓底

杯螯如墮酒船中
尊鱸本是詩人事
樽俎那容俗子同
不日挽君來快問
請分一筯供涪翁

雜錄

台州札記陸游劍南詩稿題徐淵子環碧亭亭有茶山
曾先生詩云茶山丈人厭囂譁幅巾每訪博士家小亭
談笑不知暮往往城上聞吹笳興來傑作粲珠璧歲久
妙墨亡龍蛇郎君弟子多白髮回頭日月如犇車徐卿
赤城古仙子十年四海推才華覽觀陳迹喜不寐旋補
鱗漏支傾斜曲池還浸古來月鼓莽忽見當時花重題
舊句照高棟力振風雅排淫哇席閒紵袍已散鵲堂上
講鼓初停撾速宜力置竹葉酒不用更瀹桃花茶注桃

花茶見曾公詩曾詩今不傳亭當爲淵子重新今亦莫

知其所在蔡按黃巖縣志環碧亭宋祕書監徐似道所居遺址在今太平上圳

鶴林玉露劉改之賀徐直院啟云以載鶴之船載書入

觀之清標如此移買山之錢買視平生之雅好可知淵

子詞清雅余尤愛其夜泊廬山詞云風緊浪花生蛟吼

鼉鳴家人睡著怕人驚只有一翁捫蝨坐依約三更雪

又打殘燈欲暗還明有誰知我此時情獨對梅花傾一

盞又詩成

四朝聞見錄寧皇立皇子洵時上春秋猶盛竹隱徐似道行制詞內二句云爰建神明之胄以觀天地之心眞學士也其意味悠長矣

困學紀聞徐淵子上梁文云林木翳然便有濠濮閒想
清風颯至自謂羲皇上人初寮啟云得知千載上賴古
書作吏一行便廢此事皆全句 徐淵子爲越教答項

平甫云正恐異時風舞雩之流不無或者月離畢之問
耆舊續聞徐淵子賀謝相深甫二子登科啟云三槐正
位人瞻袞繡之榮雙桂聯芳天發階庭之秀出則告辰
猷於虎拜稽首之際入則訓義方於鯉趨過庭之時滄
海珠胎發爲朝采藍田玉種積有夜光又云雖官爵乃
公家所自有而世科豈人力之能爲謝以爲譏已亦不
樂之

萊按嘉泰二年傳行簡榜
謝采伯萊伯同登進士

困學紀聞徐淵子詩植杞必植梓藝蘭仍藝蓀過庭遺

訓在鑿楹故書存蓋以梓蓀喻子孫也鑿楹出晏子春秋

太府卿王醒庵先生卿月

赤城志乾道五年鄭僑榜進士王卿月臨海人字清叔
歷宗正寺主簿太府寺丞祕書郎起居舍人起居郎權
中書舍人兼直學士院知廬州湖南轉運副使知靜江
襄陽府瀘州宗正少卿兼檢正中書門下諸房公事假
吏部尙書爲金國生辰使未行除太府卿卒終朝請大
夫事見樓參政鑄所爲銘按先生初登乾道二年蔡必勝榜武科進士亦見赤城志
兩浙名賢錄王卿月字清叔臨海人博學工古文辭不
隨時好力還古雅登乾道五年鄭僑榜進士第歷官太

府寺丞假吏部尙書充金國生辰使未行進太府卿卒
終朝散大夫卿月嘗權中書舍人直學士院掌制誥所
草詞百餘篇不避嫌不修怨不飾美以市恩不畏勢以
屈筆深得代言之體嘗草胡銓制云吾寧身蹈東海獨
仲連不肯帝秦至今名重泰山微相如何以強趙時論
重之自稱醒庵居士所著有醒庵集

古文苑

攻媿集太府卿王公墓誌銘公諱卿月字清叔世居開
封府父思正徙台州今爲台人公生於贛上嫡母太恭
人商氏夢月墮於前以裾承之僅得其半是夜陸宜人
實生公故以命名焉隆興改元試入右庠乾道二年中
其科授承節郎德安府復州漢陽軍都巡檢非其志也

五年登進士第調温州樂清尉到官值海寇充斥制司督捕甚急諸將皇遽公處之自若密使人扼其境路所出相繼就擒憲使程公大昌奇其才薦於朝乾道七年十一月召對稱旨改承奉郎守宗正寺主簿九年三月遷太府丞六月爲祕書郎兼吳王益王府教授淳熙元年七月除起居舍人十一月除起居郎兼中書舍人二年兼直學士院公起尉曹不四年擢用爲文字官嘗草胡公銓詞云吾寧身蹈東海獨仲連不欲帝秦至今名重泰山微相如何以強趙人多稱之五月除直祕閣知廬州僅七旬而陸宜人年高嬰疾請祠歸五年八月起知靜江府時臣僚有謂廣西鹽法不便於民欲罷官鬻

而行鈔法公力言鈔法之害五千餘言雖一時不能行
案如公所料十年七月移帥襄陽十五年冬除利州路
提刑改帥瀘州紹熙三年除宗正少卿六月假吏部尙
書爲金國生辰使未行除太府卿已而瘍發于背或勸
其辭行公曰君命不可辭也七月行次揚州卒于舟中
年五十有五公性警敏記誦絕人先以武舉進旣精習
兵書武事又登儒科詞章贍蔚古事今事問無不知旁
通釋老之書百家之學游藝多能爲士林第一至于攷
辨鼎彝古器游戲翰墨丹青一一造妙而又貫穿文法
練習吏事恩威兼舉所在辦治娶趙氏子三人長好謙
迪功郎紹興府諸暨縣尉好問好生竝將仕郎以十月

已酉葬公於臨海縣之牛極山合趙氏之墓

宋元學案王卿月字清叔祥符人也南渡卜居天台累官至太府卿其提刑蜀中時從康節後人傳其易學論人窮達壽夭甚中及以吏部尙書充金國生辰使語家人曰今年吾當厄萬里之行其能免乎已而疽發于背或勸之辭曰君命也行次揚州卒先是取其所著書盡焚之遂無傳

建炎以來朝野雜記乾道淳熙閒太學諸生久不第者

多去從武舉已乃鎖其廳應進士第時王卿月時敘首

應三舉後官至修注

蔡按時敘當作清叔又寧海楊淵起字少望嘉定七年劉必萬榜武

科亦以十年吳潛榜

登進士第見赤城志又淳熙元年九月幸玉津園講燕

射之禮起居舍人王卿月亦射中賜襲衣金帶

圖繪寶鑑王清叔字醒齋開封人乾道閒進士又號醒庵學廉宣仲畫枯木竹石官至太府卿世稱王經略之名特著

聞見錄道樞之說博而寡要王清叔云莫要於龍虎交其說以巳午兩時絕思慮假寐則龍虎自交不假修爲其寵姬病骨蒸授以此法十日後自覺腰閒煖如火疾自愈

夷堅志天台王卿月字清叔生於紹興戊午敏悟多藝能琴弈下筮音律射醫無所不妙解有琴一張絕佳殊自寶惜卽起居舍人出牧淮西至淳熙庚子年四十有

三矣在鄉里夢一道士霞裾雲頤氣拂霄漢才見卽與之琴王驚喜捧翫卽已物也笑之謝曰是吾家所藏何必爾道士曰舍人徒有此琴未識其意因覆琴背龍池示之中刊八字曰一紀之年事在小紅方擬叩其指而寤紹熙壬子自瀘南召還爲宗正少卿從牙僧得一善弈小鬟問在家時名爲何曰小紅也猛憶昔夢而相去恰一紀鬟旣工於技又能七絃遂倍常價買之而畀以所寶者嬖寵甚至纔兩月被命使金國王固精五行以是歲運限衝擊不願往辭之再三不獲至七月七日出國門到姑蘇疽發背閒至京口浸劇未及揚州十里而

卒

台州札記王卿月字清叔築園北山之麓取孔德璋移
文中語列爲扁榜清叔有自題北山玉寒堂詩三首刻
柱上春光又過九之一十日大都三日晴陰晴要是不
須問日日爲春來一行客來清話固所欲遇酒草酌又
何傷是非有耳不願聽乞我半日心清涼松成不見種
松人借爾相陪見在身歲月暗銷松暗老焉知此地不
荆榛按風雅遺聞云嘗遊北山覓王公遺跡了不可
得噫滿目荆榛醒庵于數百年前已預料之矣
三台詩錄王卿月長淮晚望詩目斷長淮渺莽中孤城
突兀倚層空寒砧幾許遞秋信漁笛一聲橫晚風龍吐
晴雲嵐氣白鴉翻落日水天紅扁舟今夜宿何處赤壁
斷磯蘆葦叢

文靖謝密齋先生采伯

嘉業堂刊

赤城志嘉泰二年傳行簡榜謝采伯臨海人字元若
棐伯之兄歷知廣德軍湖州監六部門大理寺丞今爲大理正
按同榜謝棐伯字元常深甫之子終通判漳州又按密齋筆記采伯嘗爲諸暨主簿紹定庚寅山泉舡除新安又嘗四典縣兩佐州見所撰台州奏行萬戶記

江南通志謝采伯紹定間知徽州府徽與衢嚴接壤盜發常山采伯請調兵遏之禱雨輒應虎豹遁跡
程敏政文獻志

按据此則密齋非徒文學足稱其政績亦復不可及矣

郭石齋筆記謝采伯字元若丞相深甫長子登嘉泰二年進士仕至保康軍承宣使提舉神佑觀除節度使贈

魏國公諡文靖子七長奕修仕至寶謨閣直學士提舉

神佑觀開國男食邑五百戶

按密齋筆記奕修喜藏名人尺牘嘉熙己亥守湖州

寶祐丙辰

次奕楸仕至刑部尚書郎

按寶祐乙卯以奉議郎知撫州見密

齊筆

記跋三奕恭仕至朝奉郎知龍游縣四奕容仕至朝請

郎兩浙轉運知華州提舉雲臺觀五奕信登咸淳二年

進士仕至朝奉郎直寶謨閣知永州

按赤城新志咸淳進士無其名蓋特

也科六奕明仕至武翼郎閤門祇候浙江兵馬鈐轄七奕

進仕至訓武郎

附錄謝渠伯字元石號南山丞相深甫次子仕至朝奉大夫通判澧州主管建

昌府仙都觀封太師女爲理宗后追封衛王諡恭簡子

二長奕昌仕至少師保寧軍節度使提舉萬壽觀贈太

師封惠王諡莊憲次奕禮仕至少保節度使開府儀同

三司封秦國公贈少師諡曰安追封潤王謝渠伯字元

常深甫三子嘉泰二年進士仕至中散大夫通判潭州

子四長奕翼朝請大夫知嘉興府事次奕謙居新塗縣

登進士仕臨江宣義郎三奕良儒林郎監提鎮江戶部
 竊賣酒庫四奕晉將仕郎謝彙伯字元口深甫四子仕
 至朝請大夫通判泉州兼內外宗正丞贈光祿大夫子
 二長奕中仕至朝請大夫大理寺卿次奕正贈諸院
 按宋史謝皇后傳咸淳三年進封三代父渠伯魏王祖
 深甫曾祖景之皆魯王兄奕封郡王姪堂兩浙鎮撫大
 使尚榮郡公主堡直節度使端平初頗干國政云宋
 季三朝政要則云咸淳元年太后兄謝奕封郡王姪堂
 直堡屋皆節度使德祐元年六月謝堂鎮撫使十月謝
 堂知臨安府二年正月謝堂簽書樞密院事十九日謝
 堂樞密院二月乙卯初三宮北遷參政謝堂亦在遣中其
 干國政蓋在德祐初宋史乃云端平誤矣又畫史會要
 謝堂號恕齋善竹石松蘭清雅可愛則亦風雅之士也

按謝子肅四子十五孫三代五進士四代五封王曾
 孫尚公主位執政家門鼎盛吾台無兩則其祖德之
 厚可知矣

遺書

密齋筆記五卷續記一卷

永樂大典本

四庫全書總目采伯宋史無傳其事蹟不甚可考官爵名字僅見於陳耆卿赤城志中是編乃其易班東歸時所撰錄以示其子者雜論經史文義凡五萬餘言自序以爲無牴牾於聖人其閒援據史傳頗足以考鏡得失雜錄前賢懿言美行亦多寓懲勸雖持論閒有未醇其援引證據亦未能如容齋隨筆夢溪筆談之博洽而語有本原瑜多瑕少要亦說部之善本也史稱謝后父渠伯早卒兄奕宗按宗當作昌封郡王姪並節度使端平初按當作德祐初頗干國政采伯以世家貴介敷歷中外游更麾節政當謝后用事之時按理宗時謝后

未嘗用事獨能解組逍遙至使史官佚其姓氏則蕭然於榮利之外一無所預可知王宗旦原序謂士大夫晚節嗜好鮮有不迷其初者密齋獨以書籍詒謀後人使知其老不忘學則采伯潛心著述殆以一生之精力爲之宜其言多中理矣原本久佚僅散見永樂大典中謹採錄編綴分爲筆記五卷續記一卷仍所題之舊目焉

密齋筆記自序

余好漁獵書傳時年六十有三易班東歸天賜一閒無以解日書生結習未除亦自狃有聞見豈應以鷗弁泯沒遂著於篇以示兒輩曰或問者兒輩所質問也經史

本朝文藝雜說幾五萬餘言固未足追媿作者要之無
抵牾于聖人不猶愈於稗官小說傳奇志怪之流乎庶
後之子孫知余老不廢學云爾淳祐元年辛丑長至謝
采伯元若引

按密齋以端平元年九月奉京祠歸至淳祐元年年
七十矣

密齋筆記序

王宗旦

寶祐乙卯天台謝公鼓院來守臨川宗旦實爲贅貳一
日以密齋筆記授宗旦曰此吾先君子晚年之所著也
宗旦受而讀之驚喜歎賞如遊寶山如閱海市瑰奇詭
異之物雜然前陳駭目洞心應接不暇吁是豈淺鮮者

所能到哉其殆貫穿百家馳騫千載者歟夫士非窮愁
莫能著書一行作吏此事便廢常情之通患也矧耆耄
高蹈燕居引恬未有肯措意於筆硯者密齋以宰相子
數歷中外游更麾節晚境倦游乃能逍遙里第耽玩墳
索抽毫瀆墨述所得以自見於世所謂富貴不能淫年
彌高而德彌劭者密齋有焉陸賈當功成名遂之餘乞
身歸田擁車騎負寶劒遨遊諸子閒醺酒擊鮮以自娛
樂追思向來新語殆如夢事向子平隱居讀易自男婚
女嫁之後斷絕家事勿使相關迺肆意於名山大川之
觀曩時韋編不復過眼矣王逸少蘭亭一序似能言者
及其守早退之節又不過企慕子平所爲盡山水之遊

求藥石植桑果抱子弄孫以卒歲於著書乎何有以密齋視三子富貴年齒度越遠甚謂宜屏卻簡編燕酣登眺可也而密齋之所樂爲有三子之所不克爲者由是言之士大夫晚節嗜好有不迷其初者鮮矣觀密齋自序謂以此書傳示子孫使知其老不廢學噫此其貽謀微意又可與俗人言哉越明年鉉梓郡齋輒爲題其後鼓院名奕楸密齋先生次子寶祐丙辰夏五中泮通直郎添差通判撫州軍州兼管內勸農營田事王宗旦謹書

密齋筆記跋二首

成公策

謝奕楸

昔歐陽公著歸田錄范蜀公作東齋記事皆在辭蟬捨

冕後蓋前輩於文章翰墨若饑食渴飲未嘗一日廢非
有老壯之分仕止之閒也密齋先生年六十有三卽弭
節杜門淡然無營惟耽玩書史遠紹旁搜今觀筆記一
書如武庫乍開戈矛劍戟犀利森列使人毛髮竦豎非
胸次千古筆力萬鈞疇克爾歟其視歐范二公風流蘊
藉相似也臨川使君一日出示家集且病舊板漫漶字
有脫誤將屬太史王公是正之別鰓之梓方動念閒忽
夢密齋如生平是知公於斯文雖神遊八極未能忘情
嗚呼其精豈不敬畏哉漢韋賢父子以明經位宰相時
人爲之語曰遺子黃金滿籛不如教子一經今密齋獨
以文印傳子孫而使君又克成先志是亦韋氏一經之

教由此觀之君家之福未艾也寶祐丙辰季夏朔日通
直郎通判撫州軍州兼管內勸農營田事成公策識
右密齋筆記別經史本朝文藝雜書釐爲五卷續記一
卷先公易班東歸晚年著此比鉞梓家塾而字小不便
老眼舛誤未暇考訂奕楸挈來臨汝欲刻置郡齋迺是
正魚魯其閒至有脫簡者亦復增補使備始得爲善本
一夕夢先公若有喜色謂奕楸曰汝日所爲吾從旁覘
行又往嫠女矣蓋大卿兄守嫠故也嗚呼先公歿六年
而精爽炯然託諸夢以詔諸孤一舉措頃在其左右顧
不肖何以稱塞惟戰戰兢兢是戒是懼而已旣刊此書
屬兩倅題卷末輒復記此時寶祐丙辰孟秋中澣男奉

議郎權知撫州軍州兼管內勸農營田事節制軍馬奕
林百拜書

按筆記云端平元年九月余奉京祠方抵舍發熱不
止面浮目腫不能食一醫者曰非服附不效左右駭
笑醫曰行年六十三不服附耶余曰此柴胡證也亟
取人參和柴胡煎熱云云此跋在丙辰而云歿六年
則密齋卒於淳祐十一年辛亥年八十矣

筆記又云黃帝曰夫子數言熱中消中不可服高粱
芳草石藥石藥發癰芳草發狂註云多飲數溲曰熱
中多食數溲曰消中多喜曰癰多怒曰狂高粱之疾
也世人鄙世祿爲膏粱古字通用余村居齧菜根決

無此主證則密齋之儉可知矣

遺詩斷句

歸來鄰里悉不記未免驚呼問桑竹

密齋筆記寶慶丁亥余寓報慈改葬

亡室初秋夢歸自東家四顧蕩然絕無居室時夕陽未收獨步平沙金星粲屑前山奇秀層出旁植桑竹因賦長篇覺來略成誦倚囁口吻閒迨曉止記憶因因筆僧窗云云紹定庚寅由泉舶除新安劍浦盜發余自三山道陳嘉而歸己丑大浸江岸僅存桑竹

遺文

台州奏符萬戶記

三台文獻

臣聞諸父老治郡通閩廣嵐瘴爲厲非酒無以禦其毒故其民食酒習慣爲常嗜利冒禁曾不少戢紹熙間守臣徐子寅蠲其禁寶慶間守臣葉棠有志舉行會除常

平使者繼奉詔攝州巨浸之餘民不堪命亦蠲其禁然
皆僅僅兩載而不能以久者未嘗聞於上也端平三年
守臣陳振孫因士民之有請稽本息之盈縮條公私之
兩利以聞于上鑒諸樂石俾民歌咏聖德以詔來者其
慮遠矣臣以爲權酤非常賦也漢武帝用兵乏餉而撓
也武帝席文景富庶之餘業用兵纔三十餘載而海內
已虛耗遂作俑權酤繼世亦悔其失固嘗罷行而言利
之臣接踵於後世豈能悉意捐去是用兵之禍歷一千
三百八十餘載而未已也按漢書初權酒酤在天漢三年癸未至端平三年丙申凡
一千三百三十三年此云
八十者誤多數一甲子也臣嘗兩佐州四典縣私釀亦
固有之然令下之日秋毫無犯獨臣里中更守臣十餘

人繩以一切其弊自若走卒坐鋪譏邏旁午而匿姦藏
慝反滋弊數若官吏夫匠之屬日賂月餽皆有定數歲
終則倍之有挾者寄造率十餘家彊有力者抑又甚焉
不幸而獲則不過升斗窮窶人也彎卒例擒以逃譴其
始獲也必讓曰以供囚也其編置也復讓曰以奉護送
也故酒麴秫米之四鄰與在城內外之飲客簞楚日報
而私釀日盛官額頓虧本息折閱承流宣化者亦付之
於無可奈何而後止其弊極矣小大之臣但知增取之
爲工苛慘以求勝而莫以蠲禁爲上言者聖德如天眈
民如子豈忍與爭錐刀之利而戕民以徒流之酷哉特
民瘼不卽以上聞爾今賢守臣洞見官額初無毫釐杪

忽之虧而在民獲安靜和平之福迺爲奏請而賢相國
爲之敷陳聖主亟俞之頒降省劄以示遵守與國無極
除漢武以來一千三百八十餘年之患邦民幸甚得保
生業奉賓祀無刑辟之虞熙熙然若生於唐虞三代之
世而聖德巍巍同唐虞三代之盛矣願不偉哉

莫菴桑澤卿先生世昌

父莊

赤城志僑寓桑莊高郵人字公肅官至知郴州紹興初
寓天台曾文清公幾志其墓有茹芝廣覽三百卷藏於
家子世昌自號莫菴有文集三十卷事見尤尙書表楊
閣學萬里陸待制游樓參政鑰葉侍郎適序跋
台州外書桑世昌字澤卿天台人郴守莊之子陸游外

甥也博雅工詩喜集古今名人書籍及遺文軼事不以
科名爲事晚號天台老樵常在錢塘西湖閒一筇雙屐
如野鶴昂然不可羈致謝丞相子肅贈詩有春光只戀
西湖好不念台山老桂枝之句

台州札記蘭亭考十二卷宋桑世昌澤卿撰前有嘉定
元年十二月高文虎序稱晚挈書結廬山陰一日澤卿
攜此編見又有嘉定十七年九月高似孫序稱今茲浙
東臺使齊公屬加彙正遂略用史法剪裁之此書初成
本名蘭亭博議後刊刻時頗有刪改卽今傳本是也末
載鞏栗齋跋稱澤卿年七十餘著蘭亭考又有嘉定初
元道山堂觀蘭亭陳舜申諸人題名黃芻子耕題跋亦

當在嘉定四五年間留守台州時其時澤卿尙存至十四年齊碩守台州其跋稱至郡有以桑君蘭亭考見示者不云見其人蓋澤卿時已亡故屬高似孫爲之彙正也

題桑世昌蘭亭博議後

永嘉葉適

水心文集二十九

字書自蘭亭出上下數千載無復倫擬而定武石遂爲今世大議論桑君此書信足以垂名矣君事事精習詩尤工其卽事云翠添鄰塹竹紅照屋山花蓋著色畫也

桑澤卿莫庵詩集序

永康陳亮同甫

赤城集

余平生不能詩亦莫能識其淺深高下然常聞韓退之之論文曰紆餘爲妍卓犖爲傑黃魯直論長短句以爲

抑揚頓挫能搖動人心合是二者於詩其庶幾乎至於
立意精穩造語平熟始不刺人眼目自餘皆不足以言
詩也天台桑澤卿來客西湖爲詩數百篇無一句一字
刺人眼者可謂用工於斯術者矣劉牢之大小數十戰
方爲名將何無忌從容坐談而靈寶以爲酷似其舅一
戰而勝彼亦略似之然終非其真也澤卿試問之渭陽
李靖之兵法旣盡乎骨肉之間有留行則人將議其慘
矣

四庫全書總目蘭亭考十二卷舊本題宋桑世昌撰世
昌淮海人世居天台陸游之甥也按陳振孫書錄解題
載蘭亭博議十五卷註曰桑世昌撰葉適水心集亦有

蘭亭博議跋

按已見前

書錄解題又載蘭亭考十二卷註曰

卽前書浙東庾司所刻視初本頗有刪改初十五篇今存十三篇去其集字篇後人集蘭亭字作詩銘之類又附見篇兼及右軍他書迹於樂毅論尤詳其書始成本名博議高內翰文虎炳如爲之序及其刊也其子似孫主爲刪改去此二篇固當而其他務從省文多失事實或戾本意其最甚者序文本亦條達可觀亦竄改無完篇首末闕漏文理斷續於父猶然深可怪也云云是此書經高似孫竄改已非世昌之舊矣今未見博議原本無由驗振孫所論之是非然是書爲王羲之蘭亭序作集字爲文其事無預於羲之羲之他書其事無預於蘭

亭似孫所刪深合斷限振孫亦不能不以爲當也其中
評議不同者如或謂梁亂蘭亭本出外陳天嘉中爲智
永所得又或謂王氏子孫傳掌至七代孫智永此蘭亭
真迹流傳之不同也又如或謂石晉之亂棄石刻於中
山宋初歸李學究李死其子摹以售人後負官緡宋祁
爲定武帥出公帑買之置庫中又或謂有遊士攜此石
走四方其火死營妓家伶人取以獻宋祁又或謂唐太
宗以搨本賜方鎮惟定武用玉石刻之世號定武本薛
紹彭見公廚有石鎮肉乃別刻石以易之此又定武石
刻流傳之不同也推評條下據王羲之生於晉惠帝太
安二年癸亥則蘭亭修禊時年五十有一辨筆陣圖所

云羲之年三十三書蘭亭之誤是矣然前卷既引王銍語以劉餗之說爲是矣而又云於東墅閱高似孫校書畫見蕭翼宿雲門留題二詩云使御史不有此行烏得是語則襍錄舊文亦未能有所斷制至其八法一門以書苑禁經諸條專屬之蘭亭尤不若姜夔禊帖偏旁考之爲精密是以曾宏父陶宗儀諸家皆稱姜考而不用是書然其徵引諸家頗爲賅備於宋人題識援據尤詳世昌之原本旣佚存此一編尙足見禊帖之源流固不得以陳氏之排擊遽廢是書矣

回文類聚四卷宋桑世昌編考劉勰文心雕龍曰回文所興則道原爲始梅庚註謂原當作慶朱賀道慶也蓋

其時璇璣圖詩未出故勰云然世昌以蘇蕙時代在前
故用爲託始且繪像於前卷首以明剏造之功其說良
是然藝文類聚載曹植鏡銘八字回環讀之無不成文
實在蘇蕙以前乃不標以爲始是亦稍疎又蘇伯玉妻
盤中詩據滄浪詩話白玉臺新咏以外別無出典舊本
具在不聞有圖此書繪一圓圖莫知所本考原詩末句
稱當從中央周四角則實方盤而非圓盤所圖殆亦妄
也唯是咏歌漸盛工巧日增詩家旣開此一途不可竟
廢錄而存之亦足以資博洽是書之末有世昌自跋稱
至道御製登載卷首此本無之殆傳寫佚脫歟

三台詩錄桑世昌字澤卿蒼梧太守公肅子博洽有時

名甚爲謝子肅丞相所重嘗著蘭亭博議十五卷高似
孫爲刪存十二卷名蘭亭考識者謂不如原書完善又
嘗輯回文類聚及西湖紀逸考林逋事甚詳

遺詩

寄丹丘林詠道

用林和靖韻

小別俄驚歲屢周尺書每每寄江頭逢時共歎君肥遯
投老誰憐我倦遊書足三冬應潤屋詩成千首必輕侯
一尊縱負東湖約尙及黃花碧樹秋

夜對巾山塔燈呈史君李孟達寺簿

光明臺畔舊曾逢何自飛來碧海東未問眼根齊等級
要先心地證圓通入還究竟千光合四面回旋一視同

坐想玉霄風月夕超然清對一詩翁

台學統卷五十六